



▲Bohseng Liengz Cigiz (bah-swix) daenj buhbing.

Gou miz song daxboh: Boux ndeu dwg bohseng, boux ndeu dwg boh-laeng. Song daxboh gou cungj dwg bouxbing caemh seizdaih, ndang daenj buhbing, maenh'ak raixcaix, vifung dangqmaz. Boux ndeu vih laebbaenz Cungguk moq buekmingh hoenxcienq, boux ndeu youq gwnz-namh Cauzsenh dingj bang bing Meijgoz gvaq. Songde cungj deng sieng gvaq, laeb goeng gvaq, dwg boux gwmzing geq, gungcanjdangjyenz geq!

Bohseng gou heuhguh Liengz Cigiz. Youq mwh sam beixnuengx dou lij iq, de baenz bingh naek couh biek yahlwg bae lo. Daengx ranz vunz cungj simcieg yaek dai.

Youq ndaw gaijfang cancwng, de mbouj lau dai, bonghfoedfoed gaj vunzdig. Miz baez ndeu, aen doihbing de deng vunzdig humx, yungyiemj raixcaix. De doq caemdingh roengz-daeuj, lumj duzmeuz nei bin hwnj gwnz ranzvax, ciengciemq gij deihsieiq mizleih, aeu cungq nyingz

gyoengq vunzdig dangqna, yenjhu canyouj cung okbae. Laegfwng, vunzdig fatyienh de lo, couh gyoeb-comz nyingz coh de. De boux dog youq gwnz ranzvax doq ndoj doq nyingz cungq. Doeklaeng de deng vunzdig nyingz deng fajnaj, gyo ndaej miz boux canyouj gibseiz gouq de. Gvaqlaeng youq yihsen yw sieng, gij baksieng de ndei lo, hoeng gokbak de cix miz di mbit lo. Baenzneix, nyinhdingh de ndangcanz dwg sam gaep gyap daengi, caemhcaiq fat mbaw cingq bouxbing ndangcanz.

Daxmeh gou ciengzciengz gik-doengh dwen daengz bohseng gou—1949 nienz 2 nyied, de youq Bingzei Yen(seizneix Bingzgoj Si) cawjlig dadui dang duicangj caeuq fulenz-cangj. 1949 nienz 6 nyied, aen budui neix caeuq vunzdig doxhoenx, gaj haujlai vunzdig, doeklaeng ndaej hingz. Bihaenx 10 nyied, Bingzei Yen Laenzseiz Yinminz Cwngfuj laebbaenz. Youq baez hoenxcienq neix, bohseng mbouj lau dai saekdi, cung bae gonq, ndaej yinzminz cwngfuj ciengj hawj bak gaen haex-hau. 1950 nienz 1 nyied, baihgwnz diuh bohseng daengz Vujmingz Yen-veij guhhong. Youq Vujmingz, de baengh vunzlai, gaenxguh mbouj yiemz baeg, aeundaengj cingzciak yienj-da.


1952 nienz, de daj doihbing cienjnieb daengz Lingzloz Yen Gungh' anghiz guhhong. De guh saeh lij lumj bouxbing nei, cienzmienh

cingceih gij cianh dangdieg, gaemh bouxfamhfab, bauj lwgminz bingzan, lwgminz dangdieg bouxbou haenh-ndei. De youq 1953 nienz, 1954 nienz laeb daihgong baez ndeu, iet-daengjgoeng song baez, bingj-daengjgoeng baez ndeu. 1955 nienz, de miznaj ndaej gyahaeuj Cunghgoz Gungcanjdangj.

1962 nienz, Lingzloz Yen baen yen. Bohseng diuh bae Lozyez Yen Gungh' anghiz. Seizde, dangdieg miz doenghgi saeh hoj guh. Vihneix, dangjucjiz daengdaengq diuh de bae daengz Lozyez Yen Yajcangz Gunghse guhhong caemhcaiq giem guh baicuzsoj sojcangj. Bohseng dangsaeh gvaqlaeng, miz aen gunghse caeuq vunzlai dangdieg haeujoengh, vaiqvit guhbaenz gij hongsaeh baihgwnz daengq, vih dajcauh aen vanzging ndawbiengz an' onj guh ok gung-hawj moq.

Doeklaeng baihgwnz roengzlingh diuh bohseng dauq Lozyez Yen Gungh' anghiz. Hoeng, seizde bohseng aenvih sieng gaeuq caiq fat caeuq ciengzgeiz guhhong dwgengz lai couh bingh laemx le, bingh sikhaek bienq naek. 1963 nienz 8 nyied, de youq Nanzningz ciengjgouq lai baez, hoeng cungj mbouj miz yungh, doeklaeng lizbae lo. Bide, de ngamq ndaej 38 bi.

Dangseiz, dou sam beixnuengx lij iq, daxmeh mbouj miz hong cingqsik, dan baengh guh di honglingz gvaq ndwenngoenz. Ndigah, mwh bohseng youq Nanzningz ywbingh, cijndeik dak



▲Bohseng Liengz Cigiz.

boux Auseiq ciuqgoq de. Dou cungj liuh mbouj daengz bohseng baenzneix vaiq couh liz bae, yahlwg byawz hix mbouj ndaej youq henzndang de. Auseiq mbouj rox saw, baenzneix bohseng dai bingh le, de mbouj rox bohseng dou moek youq gizlawz. Baenzneix, dou itcig mbouj rox gizdieg bohseng ninz youq gizlawz. Cig daengz bi daihgong gou guhhong le, youq Gvangjsih Bouxcuengh Swegih Gungh' anghingh bangcoh baihlaj, cij youq Gvangjsih Lezsw Lingzyenz ra raen aen moh bohseng. Saedcaih doiq mbouj gvaq bohseng ha! (1)

“Daiq, Aulungzgeiz gig gyo-mbaiq bohgox ne! De naeuz bide danghnaeuz mbouj dwg bohgox oknaj bang de youq laeng mihsaenzvuengz hwnj aen ranzdaemq he, de lij ninz youq gwnz mbaeklae naj miuh o.”

“Ai, gyo' mbaiq? De gangj ndaej soengswt, bide bohgox mwngz hix mbouj rox deng geijlai vunz ndaq! Vunzmbanj cungj mbouj doengzeiq hawj Lungzbyauh ce youq ndawmbanj, maqmuengh de caeuxdi dai, hoeng mingh de raezrangrang, dauqfanj lix ndaej lumj duzvaiz.”

“De ndoet laeuj gwn mbei ngwzdoeg ne.”

“De couhdwg duz ngwzdoeg ndeu, bohgox mwngz hix dwg rasaeh, ce de youq ndawmbanj, couh lumj ce duz ngwzdoeg nei, baenzbaenz cungj yaek haeb vunz— Ai, mbouj rox Ahvej gwn ywdoj le baenzlawz yiengh lo? Gou haxbaenh lij siengj: Lungzbyauh simsaen ndaemfoux, itdingh haemz dai mehlwg Ahvej lo, saek-laeuq de……”

“Danghnaeuz De daengdaengq aeu di ywdoj loengh dai Ahvej?” Gou doq ciengj coenz vah daiq cam.

“Mwngz naeuz de rox mbouj rox

•Sawcuenhraz Lwngnyez•

Gij Golwngnyez Henz Dahhoengz

红 水 谣

□ Lanz Haijyangz Moz Beibei / 蓝海洋 莫蓓蓓

baenzneix guh? Gou cungj miz di ngeizvaeg, haxbaenh mbouj wnggai bae ra de aeu ywdoj.”

“Haxbaenh Simjemheij gag bae ra de aeu ywdoj, de haendu lij mbouj nyienh hawj ne.”

“Ai! De baenzlawz ndaej caen-ndang bae ra Lungzbyauh ne? Caen dwg fatbag, boux mehmai coz——”

“Simjemheij naeuz de vihliux Ahvej, maz cungj mbouj dam lo.”

“Saejlaet! Fatbag!”

Daiq daj gwnz eigvaengx ndwn hwnjdaeu lo, de gig hozgaek, fajfwngz mbouj dingz bek gwnzdaiz, lumjnaeuz ienq Simjemheij mbouj wnggai vih daeglw de gag bae gouz Aulungzgeiz aeu ywdoj, gou youh mbouj doengzeiq gij yawjap daiq lo, hoeng raen daiq baenzneix gikdoengh, gou mbouj gamj

dwen.

“Doeklaeng, vihmaz youh hawj ywdoj lo?”

Daiq fwngz ndeu dawz doengzien, dauqungz naengh roengzdaeu, gou doq coux gvaq diuz ceijdwkfeiz hauej ranzcauq bae dwk feiz, buet dauq ndenq ceijdwkfeiz hawj daiq dap naeuz:

“Doeklaeng Simjemheij heiq-hwnj fofu deuz lo, Aulungzgeiz cij dawz song bau ywdoj okdaeu, heuh gou soengq bae hawj Ahvej.”

“De mbouj gag soengq bae, heuh mwngz soengq?”

“De naeuz gou buet ndaej vaiq.”

“Ndawde miz yaemmaeuz!”

“Baenzlawz?”

Daiq cit doengz ien ndeu caengz liux, couh ndaep ceijdwkfeiz bae lo,

de cuengq doengzien roengz, ndwn hwnjdaeu fwngz ndeu coq youq gwnz mbaq gou, gaenj naeuz:

“Vaiqdi, raeuz daengz ranz Ahvej bae yawjyawj.”

Gou caeuq daiq doxlumj, hix simgaenj raixcaix, rex daiq doq byaij bae ranz Ahvej.

Daiq deng ciemxdin gvaq, bingzciengz cawz le bae ndawmih hwnjyieng, gig noix ok doulaux yamq ndeu, gij roen ndawmbanj dingzlai dwg aeu ndaekrin caeuq cien daeu bu baenz, gumxgemx dangqmaz, gig nanz byaij, din iq daiq caij youq gwnzde, ndang de bibi buengqbuengq, dangh-naeuz mbouj dwg gou rex de, hix mbouj rox aeu byaij geijlai nanz cij byaij daengz ranz Ahvej.

(caengz sat)